

# मारवाड़ी तिमाई पतरिका

अपौरो मारवाड़, अपौरी बोली

अपरेल ऊँ जून-2019

  
empowering communities



- सूविचार:-**
1. दरिया बणकर किनेई डुबोवणऊं सकरो है, जरियो बणकर किनेई बचायो जावे।
  2. बुरो टेम किनेई बतान नी आवे है पण घणी बातों सिखान जावे है।
  3. मिनक भलेई कम हो पण हिम्मताळा होणा जोईजे, लक्से रे खातर दृढ आसता हो बे इतिहास नेई बदळ सके है।



- मुहावरा:-**
1. घोड़ो गणगोर नेई को दोड़े जको आडे दिन कांई दोड़ेला।
  2. चडिया कुत्ता केड़ोक सिकार करेला।
  3. टाबरियोऊं घर चले तो बाबो बुड्डी कियो लावे है।
  4. बोन्दरी हुती बिच्छू खागो- बिने मतळब रा चाळा करणा।



- कहावते:-**
1. भोळो अर भूण्डो भलो प्यारो अपणो पीव, देख पराई चोपड़ी कियो ललचावे जीव।
  2. ऊंट चढिये ने कुत्तो खाय इण अणहोणी रो कांई उपाय।
  3. उजड खेड़ा फिर बसे निरधनिया धन होय, गिया दिन पाछा नी बावड़े मुआ नी जीवे कोई।

# जैविक खेती

## बीजोपचार

1. पर एक एकड़ वास्ते बीज तियार करण वास्ते। आपने तीन ऊं पांच लिटर देसी गा री खाटी छा लेवणी है। प्रति एक लिटर छा रे माई तीन चिणो रे आकार री हिंग लेन पीसन छा में मिळा लेवणी है। इण में बीज मिळान दो घंटा रख देवणा है। उण पछे आप बे बीज खेत में ब्रा सको हो। इणु उगरा नियंत्रित होवे है।

2. तीन ऊं पांच लिटर गोमुर में बीज भिंजोन दो ऊं तीन घंटा रख दो। उण पछे खेत में ब्रावो। उगरा नी लागे अर पोथे ने उदाई नी लागे है।

## सिलिकोसिस योजना

राजस्थान सरकार खाण/ पत्थर मजूरों वास्ते एक योजना चलाई है। जिके रे माई जे किनेई सिलिकोसिस नाम री बैमारी हो जावे तो उने सरकार सहायता रासी देवे है।

1. अगर किनेई सिलिकोसिस बैमारी हो जावे तो एक लाख रुपियो।
2. जे किनी सिलिकोसिस री बैमारी ऊं मौत हो जावे तो तीन लाख रुपिया।

## योग्यता-

1. मजूर कार्ड बणियोड़ो होणो जोईजे (सरमिक विभाग ऊं पंजिकृत)
2. न्युमोकोनियोसिस मेडिकल बोर्ड रो सिलिकोसिस रो परमाण पतर
3. हिताधिकारी ने राजस्थान एनवायरमेन्ट एण्ड हेल्थ सैस फण्ड (रिहेब) ऊं रुपिया नी मिळियोड़ा होणो जोईजे।
4. बे मजूर जिका खाण अधिनियम 1952 रे प्रावधान में लागु होवे है, बे सहायता रासी लेवण रा पातर नही है।

## आवेदन री सीमा

मेडिकल बोर्ड द्वारा प्रमाण पतर देवण रे छे महिना या मौत होणे रे छे महिनो तांई।

## जरूरी कागद

1. मौत होणे री दसा में मृत्यु प्रमाण पतर
2. न्युमोकोनियोसिस मेडिकल बोर्ड रो सिलिकोसिस संबधी प्रमाण पतर
3. मजूर कार्ड (सरमिक कार्ड) री फोटू कोपी
4. भामासाह, रासन कार्ड री फोटू कोपी

5. आधार कार्ड री फोटू कोपी

6. बैंक डायरी री फोटू कोपी

ए सब तियार करन सरम विभाग या समाज कल्याण विभाग या खान मजूर कार्यालय रे माई एक फारम भरन जमा करणो है। फारम जमा करणे रे पछे मण्डल अधिकारी जाँच करन आपने सहायता रासी खाते में या आपने चैक दवारा परदान करावेला।

# कहाणी

## भले रो भलो होवे है

एक गांव रे माई दो भाई हॉ। एक भाई अमीर अन एक भाई गरीब हो। एक दिन दोई भाई बैठा बात करता हॉ के। इण जगत में जको मिनक भलाई करे है बो दुखी रेवे अर आपरे परिवार रो गुजारो नी कर सके है। इण बात माथे गरीब भाई रा विचार न्यारा हॉ बो के आ बात गळत है। इण बात माथे दोयो री सरत लागी के जे आ बात साची होई तो म्हारे खने जीती धनमाया है बा सब थारी नी जणे जिको गरीब खने है बो सब अमीर भाई रो हो जाई। दोई आ बात लेन गांव रो मिनको ने पुछियो तो मिनक केयो के आ बात साची है के जको मिनक भलाई करे है बो कदेई सुखी नी रे सके है। गरीब भाई हार गियो अन आपरे खने थोड़ी जमीन ही जकी अमीर भाई ले ली। गरीब भाई रे घर में खावण वास्ते अन रो एक दोणो नी हो। बो अमीर भाई खने ओधारे वास्ते गियो। जणे अमीर भाई केयो के थारी एक आँख मने दे दे। पचा किला धोन लेजा। गरीब भाई एक आँख दे दी। थोड़ा दिन पछे भळे मांगने गियो। अमीर भाई दूजोड़ी आंख ले ली। बो ओन्दो हूगो। घराळा विचार में पड़ग्या के हमे काई करो। जणे बो केयो के ओन्दे ने बजार में छोडियाजो दिन सँग में भीख मोंगु अन जिको होई ऊणु चलावो हो। केई दिन निकळग्या। एकदिन उनी लुगाई उने लेवण ने आई कोनी रात सली हूगी। बो होळे-होळे ब्रेवतो एक जंगळ में गियो परो। जान एक दरखत रे नीचे बैठगयो। जेड़े उण दरखत माथे च्यार भूत आया। अन आपरो हिसाब करण लागा। भुत एक दूजे ने पुछे है। पेलो बोलियो एक गांव में दो भाई हॉ जके में एक भाई ने ओन्दो करा दियो पण उने आ ठा कोनी के इण दरखत रे पतो रो रस ओखियो माथे लगावणेऊं उन्नी ओखियो ठीक हो जाई है। दूजोड़ो बोलियो एक गांव रे माई में सब नाडी नाडिया सुखो दिया अर लोग पोणी वास्ते मरे है पण उओ ने आ ठा कोनी के उण गांव री नाडी में जमी री सात परतो आगी लेवणेऊं उण गांव में पोणी री कमी नी रेवे है। तीजोड़ो बोलियो एक गांव में राजा री छोरी रो ब्याव होवणाळो हो पण म्हे उण राजकुमारी ने गूंगी कर दी पण जे उण राजकुमारी ने इण दरखत री जड़ो पोणी में गोळन पावे तो बा सही हो जावे है। ए सब बातो बो गरीब भाई सूणतो हो। भुत गिया परा। बो सबोऊं पेली पता आपरी ओखियो माथे लगाया ओखियो ठीक होगी। नाडी री सात परतो आगी ली गांव में पोणी पाछो आग्यो। राजकुमारी ने जड़ो घोळन पाई राजकुमारी ठीक हुगी अन राजा उने घणो सारो धन दियो अन रेवण ने एक मेहल दियो।

सिक्सा- भलाई रे फल ने टेम भलेई लागो पण फळ सकरो मिळे है।

# भजन

## समे रो भरोसो कोनी

दोहा-तुळसी नर का किया बड़ा समय बड़ी बलवान  
काबे लूटी गोपियों बो ही अरजण बो ही बाण।

समे-समे में होत समे री बात एक समे रो दिन बड़ो एक  
समे री री रात.....टेर

कदी-कदी गाडरोऊं सिंग हार जावे 2

समे को भरोसो कोनी कद पलटी मार जावे.....टेर

गुरु वसिस्ट महामुनी लिख-लिख बात बतावे

सिरी राम जंगळ में जावे किस्मत पलटी खाई

राजा दसरत प्राण त्याग दे 2, हाथ लगा नी पावे, समे  
को भरोसो कोनी कद पलटी मार जावे.....

राजा हरिसचन्द रानी तारामती रोहितास कवर कहावे

ऐसो खेल रचियो म्हारा दाता तीनो बिकवा जाई

एक हरिजन, एक बरामण एक कुबदा घर जावे, समे  
को भरोसो कोनी कद पलटी मार जावे.....

राजा री बेटी पदमा कहिये मोर लार परणाई

मोर जाई जंगळ में मरग्यो किस्मत पलटी खाई

मेहर करी महादेव मोर को मरद बणावे, समे को  
भरोसो कोनी कद पलटी मार जावे.....

राजा भरतरी रानी पींगळा मेहला में सुख पावे

सिकार खेलवा राजा जंगळ में जावे

गोरखनाथ गरु ऐसा मिळिया राजा जोगी बिण जावे,  
समे को भरोसो कोनी कद पलटी मार जावे.....

गुरु कहे ममता री वाणी अमृत रस बरसावे

म्हारो मनडो केयो नी मोने फिर-फिर गोता खावे

हरिदास गरु मिळिया पूरा रामदास जस गावे, समे को  
भरोसो कोनी कद पलटी मार जावे।

# लोकगीत

## सर्द-गरम की मौसम बना

सर्द-गरम की मौसम बनासा सेन्ट लगाना छोड दो  
में कहती हूँ और बनासा परफ्युम लगाना छोड दो।

में कहती हूँ बनासा कोलेज जाणा छोड दो

कोलेज जाणा, कोलेज पढणा छोरियों से हसणा छोड  
दो

सर्द-गरम की मौसम बनासा सेन्ट लगाना छोड दो.....

में कहती हूँ और बनासा बागा में जाणा छोड दो

बागा में जाणा गजरा गूथणा मालण से मिलना छोड  
दो

सर्द-गरम की मौसम बनासा सेन्ट लगाना छोड दो.....

में कहती हूँ और बनासा सिनेमा जाणा छोड दो

सिनेमा जाणा सिनेमा देखणा हिरोईन से हँसना छोड  
दो

सर्द-गरम की मौसम बनासा सेन्ट लगाना छोड दो.....

## हजारो योधदाओं माथे विजे पाणी सोरी

## है पण जिको आपो आपरे माथे विजे

## पा लेवे बो झाचो योधदा हैं

बणावण आळा:-

गंगाराम अर रतन लाल योगी

मदत करणाळा:-

मुकेश कुमार योगी अर कविता योगी

सम्पर्क

प्लेट नम्बर 3, तीजी मंजिल गुलाब कोम्पलेक्स  
तहसील रोड़ सञ्चियाय हेण्डलूम के पास, औसियाँ

जोधपुर, राजस्थान- 342303

फोन नम्बर - 02922-274017

Email- [rajasthanlanguages@nirmaan.org.in](mailto:rajasthanlanguages@nirmaan.org.in)

Web- [www.nirmaan.org.in](http://www.nirmaan.org.in)